



Sambanwá

GIYA SA PAGESAMBA KAN BANWAAN NIN DIOS

IKA-XXVIII DOMINGO KAN ORDINARIONG PANAHON
10 OCTUBRE 2021 • TAON B • VERDE

RITO SA PAGPOÓN

Pataratara

C — An pagigin dayupot asin masinunod-sunod sa Dios: Kita gabos inaapodan kan Mahal na Dios akoon siya, an saiyang kabôtan, an saiyang pagkamoot bilang pinaka-orog niatong kayamanan sa buhay. Ini an ipinapahayag kan liturgia ngonian na Domingo. Magkasararô kita nin huli kan presencia nin Dios sa satuya.

Antifona sa Paglaog

(S 129, 3-4)

(Sinasantib kun mayo nin Awit sa Paglaog)

Kun ika, Kagurangan, magtandâ kan mga kasombikalan, Kagurangan, siisay an matagal? Ta saimo yaon an kapatawadan, O Dios kan Israel.

Pagpangurus asin

Pagtaong-galang (Tindog)

P — Sa ngaran kan Ama, asin kan Aki, asin kan Espiritu Santo.

B — Amen.

P — An Kagurangan mapa-saindo.

B — Asin sa saimong espiritu.

Gawe nin Pagsolsol

P — Mga tugang, akoon ta an satong mga kasâlan, tanganing magkanigo kitang magcelebrar kan mga banal na misterio.

Gabos — Nagkukumpisal ako sa Dios na makakamhan, asin saindo, mga tugang, ta nagkasalâ ako nin makuri sa isip, sa tataramon, sa gibo, asin sa kapabayaan: salâ ko, salâ ko, makuring salâ ko. Kaya nangangadyi ako ki Santa Maria, danay na Virgen, sa gabos na Angeles asin Santos, asin saindo, mga tugang, na ako ipamibi sa Kagurangan tang Dios.

P — Maherak man lugod satô an Dios na makakamhan asin, pakapatawada an satong mga kasâlan, darahon kita sa buhay na daing kasagkoran.

B — Amen.

Kagurangan, maherak ka

P — Kagurangan, maherak ka.

B — Kagurangan, maherak ka.

P — Cristo, maherak ka.

B — Cristo, maherak ka.

P — Kagurangan, maherak ka.

B — Kagurangan, maherak ka.

Kamurawayan

Gabos — Kamurawayan sa Dios sa kaitaasan asin sa dagâ katoninongan sa mga tawong marahay an boót. Inoomaw mi ika, rinorokyaw mi ika, sinasamba mi ika, pinapamuraway mi ika, pinapasalamatan mi ika huli kan dakula mong kamurawayan, Kagurangan na Dios, Hadeng langitnon, Dios Amang makakamhan. Kagurangan Aking Bogtong, Jesu Cristo, Kagurangan na Dios, Cordero kan Dios, Aki kan Ama, ika na nagpaparâ kan mga kasâlan kan kinaban, kaheraki kami; ika na nagpaparâ kan mga kasâlan kan kinaban, akoa an samong pakimaherak; ika na nagtutukaw sa too kan Ama, kaheraki kami. Ta ika sana an Banal, ika sana an Kagurangan, ika sana an Orog Kahalangkaw, Jesu Cristo, kaiba kan Espiritu Santo: sa kamurawayan kan Dios Ama. Amen.

Colecta

P — Mamibi kita.

Kagurangan, namimibi kami, danay na an saimong gracia mangenotan asin magsunod samo, asin padagos kaming gibohon na maorop sa mga gibong marahay. Huli ki Jesu Cristong Kagurangan niamo, saimong Aki, na kaiba mong nabubuhay asin naghahade, kasarô kan Espiritu Santo, Dios, sa gabos na kapanahon kan mga panahon.

B — Amen.

Enot na Babasahon (Tukaw)

(Kadonongan 7, 7-11)

An enot na babasahon nagpapahayag kan kahalagahan nin pagpamibi para sa kadonongan na iwinawaras kan Dios bilang saiyang balaog.

Pagbasa sa Libro nin Kadonongan.

Ako namibi asin pakasabot itinao sakuya. Ako nakimaherak, asin espiritu nin kadonongan duminatong sakuya. Minahal ko siya orog pa sa mga centro asin trono. An kayamanan, kun ibaing saiya, mayo nin halaga para sa sako. Mayong alahas na makakapadis saiya. An gabos na bulawan garo sanang baybay, asin an gabos na plata garo sanang laboy kun itaed saiya. Namotan ko siya labi pa sa buhay asin kagayonan. Pina-orog ko siya sa ilaw, ta an saiyang liwanag dai madiklom sagkod pa man. An gabos na kayamanan duminatong sako kaiba niya. Dai mabilang an yaman sa saiyang kamot.

Tataramon kan Kagurangan.

Gabos — Salamat sa Dios.

Salmo Responsorio

(Salmo 89, 12-13. 14-15. 16-17)

S — Mamoot ka samo, Kagurangan, asin kami maawit sa kaogmahan.

1. Ipahiling mo samuya, na bilang sana an mga aldaw nin samong buhay nganing magmadonong an samong puso Kagurangan, patawad: anggot ka sagkod pa man? Kaheraki an saimong mga surogon. (S)
2. Pagka-aga, panoa kami kan saimong pagkamoot; gabos na aldaw maawit asin maogma. (S)
3. Ogma itao mo samo, katimbang kan samong kasakitan. Katimbang kan mga taon na kaidto kami nagtitios. (S)
4. Ipahiling mo an saimong gibo sa mga surogon mo; an kamurawayan mo magliwanag sa mga aki ninda, an ugay nin Kagurangan mapa-samuya; pakarhaya an gibo nin

LITURGIA KAN
TATARAMON

samuyang mga kamot; pakarhaya an gibo nin samuyang mga kamot. (S)

Ikaduwang Babasahon

(Hebreo 1, 12-13)

Sa ikaduwang babasahon ipinapasabot satuya an kapangyarihan na nag-eerok sa tataramon kan Dios.

Pagbasa sa Surat ni San Pablo sa mga Hebreo.

An tataramon nin Dios buhay asin aktibo: matarom pa ki sa espada na doble an tarom: nakakataros sagkod sa kalag asin minahatol kan satuyang mga hilom na kaisipan asin kamawotan. Dai nin anoman na bagay na dai niya nahihiling: an gabos hayag asin bukas sa saiyang mata: sa saiya inoosip niato an gabos niatong mga gibo.

Tataramon kan Kagurangnan.

Gabos — Salamat sa Dios.

Pagrokyaw

(Mateo 5, 3) (Tindog)
(Sinambit kun dai inaawit an Alleluia)

Alleluia, alleluia! Paladan an mga dukkha sa espiritu, huli ta sainda an kahadean nin langit. Alleluia, alleluia!

Evangelio

(Marcos 10, 17-30)

Dakula an balos na itatao kan Mahal na Dios duman sa nagsusunod sa saiyang kabôtan, tinatalikdan an kinabanon na kayamanan o buhay tanganing makamtan an tunay na kayamanan.

P — An Kagurangnan mapasaindo.

B — Asin sa saimong espiritu.

P — ✠ Pagbasa kan Evangelio susog ki San Marcos.

B — Kamurawayan saimo, Kagurangnan.

Pagluwas ni Jesus sa dalan, sarong lalaki nagdadalagan an nagrani saiya, nagluhod asin naghapot: “Marhay na Maestro, ano an dapat kong gibohon, tanganing makamtan ko an buhay na daing kasagkoran?” Si Jesus naghapot man: “Tadaw ta inapod mo akong marahay? Daing marahay kundi an Dios sana. Tatao ka kan mga tugon. Dai ka maggadan, dai ka magdurog sa bako mong agom, dai ka maghabon; dai ka magputik asin magtugod-tugod, dai ka magdaya, galangan mo an saimong ama asin ina.” An lalaki nagsabi: “Maestro, iyan gabos sakong inutob poon kan ako aki pa.” Hiniling siya ni Jesus,

namotan asin sinabihan: “Sarong bagay an kulang saimo: lakaw, ipabakal mo an gabos mong sadiri; an kabaklan itao mo sa mga dukha, asin an Dios sa langit iyo an saimong magigin kayamanan. Dangan madya, sumunod ka sako.” Sa mga tataramon na ini, nagraot an lalawgon kan lalaki asin naghale na mamundô, huli ta dakul an saiyang sadiri. Si Jesus nagkalag-kalag asin nagsabi sa saiyang mga disipulos: “Masakit para sa mga masadiri na makalaog sa kahadean nin Dios.” An mga tataramon na ini ipinangalas kan mga disipulos, alagad si Jesus nagpadagos pagtaram: “Mga aki, talagang masakit makalaog sa kahadean nin Dios! Mas facil pa sa camelio na makaagi sa mata kan dagom ki sa mayaman na makalaog sa kahadean nin Dios.” An mga disipulos nagkarilibong asin nagsabi: “Kun siring, siisay an makakaligtas?” Hiniling sinda ni Jesus asin sinabihan: “Iyan dai mahihimo nin tawo, alagad mahihimo nin Dios; huli ta an gabos na bagay mahihimo nin Dios.” Si Pedro nagsabi: “Ano an mangyayari samo? Binayaan mi an gabos asin nagsunod kami saimo.” Si Jesus nagpahayag: “Totoong sinasabi ko saindo: an minabaya kan harong, mga tugang, ama asin ina, aki asin ama, huli sako asin man huli sa Marahay na Baretâ, babalosan nin ginatos na harong, mga tugang mga ina mga aki asin ama, kaiba an mga kasakitan sa panahon na ini sa buhay na daing kasagkoran sa maabot na panahon.

P — Marahay na Baretâ kan Kagurangnan.

B — Pag-omaw saimo Cristo.

Homilia (Tukaw)

Pagrokyaw

kan Pagtubod (Tindog)

Credo Niceno-Constantinopolitano

Gabos — Nagtutubod ako sa sarong Dios Amang makakamhan, kaggibo kan langit asin dagâ, kan gabos na nahihiling asin dai nahihiling. Asin sa sarong Kagurangnan na si Jesu Cristo, Bogtong na Aki kan Dios, asin namundag gikan sa Ama bagô kan gabos na panahon. Dios na gikan sa Dios, ilaw na gikan sa ilaw, totoong Dios na gikan sa totoong Dios, ipinangaki, dai linalang, saro sa pagka-Dios sa Ama: huli saiyang nagkaigwa kan gabos. Huli sa satong mga tawo asin huli sa satong kaligtasan naghilig siya hale sa kalangitan.

(Sa mga minasunod na tataramon, abot sa asin nani-tawo, an gabos minaduko.)

Asin nani-laman huli kan Espiritu Santo ki Virgen Maria, asin nani-tawo. Ipinako pa sa cruz para satô kan panahon ni Poncio Pilato; nagtios sagkod sa kagadanan asin ilinobong, asin kan ikatolong aldaw nabuhay-liwat susog sa mga kasuratan, asin suminakat sa langit, nagtutukaw sa too kan Ama. Asin mamuraway na mabalik, sa paghukom sa mga buhay asin mga gadan, an saiyang kahadean daeng katapusan. Asin sa Espiritu Santo, Kagurangnan asin kagtao nin buhay: na gikan sa Ama asin sa Aki. Siya kaiba kan Ama asin kan Aki, sabay na sinasamba asin pinapamuraway: siya nagtaram sa paagi nin mga profetas. Asin sa sarô, banal, catolico asin apostolicong Simbahan. Nagpapahayag ako nin pagtubod sa sarong bonyag, sa pagpatawad nin mga kasalan. Asin naghahalat ako kan pagkabuhay-liwat nin mga gadan, asin kan buhay sa maabot na panahon. Amen.

Pamibi nin Banwaan

P — Mamibi kita sa Ama na warasan kan kusog na malampasan an mga sugot asin padagka nin kinabanon na yaman asin katiwasayan.

S — Kagurangnan, hinanyoga an samong pamibi.

1. Tanganing an Simbahan padagos na magmalasakit asin magtabang sa mga daing sukat asin pinabayaan kan sociedad, orog na sa mga dukhang nasyon, ipamibi niato sa Kagurangnan. (S)
2. Tanganing an mga nag-aapod sa saindang sadiri na mga disipulo ni Cristo makatalastas na an pagmalasakit sa kasaraditan nagtatao kan tunay na kahalagahan nin buhay, ipamibi niato sa Kagurangnan. (S)
3. Tanganing kita gabos mag-ako kan dunog na danay hanapon an Kahadean kan Dios asin mabuhay sa paglingkod kaini, ipamibi niato sa Kagurangnan. (S)
4. Tanganing an mga naghehelang asin mga biyadî rangahon asin pakusogon ni Cristo, ipamibi niato sa Kagurangnan. (S)
5. Tanganing an mga gadan niatong kadugo asin katood mag-ogma sa kapangganahan ni Cristo sa Kahadean kan Dios, ipamibi niato sa Kagurangnan. (S)

P — Mamomoton na Ama, warasan samo an kusog-boót na magdanay na dukha sa espiritu asin magsunod sa paarog ni Cristo na nagin dukha tanganing kita magin mayaman. Siya na nabubuhay asin naghahade sa kapanahonan kan mga panahon.
B — Amen.

LITURGIA KAN EUCARISTIA

Pagdolot *(Tukaw)*

(Sinasambit kun mayong Awit sa Pagdolot)

P — Inoomaw ka, Kagurangnan, Dios nin gabos na linalang, huli ta sa saimong pagka-matinao nag-ako kami nin tinapay, na idinodolot mi saimo bunga kan dagâ asin kan gibo kan mga kamot nin mga tawo, ini magigin para samo tinapay nin buhay.

B — Pag-omawon an Dios sagkod pa man.

P — Inoomaw ka, Kagurangnan, Dios nin gabos na linalang, huli ta sa saimong pagka-matinao nag-ako kami nin arak, na idinodolot mi saimo bunga kan balagon asin kan gibo kan mga kamot nin mga tawo, ini magigin para samo inomon nin kalag.

B — Pag-omawon an Dios sagkod pa man.

P — *(Tindog)* Magpamibi kamo, mga tugang: tanganing an sako asin an saindong atang maako man lugod kan Dios Amang makakamhan.

B — Akoon man lugod kan Kagurangnan an atang sa saimong mga kamot para sa kaomawan asin kamurawayan kan saiyang ngaran, para man sa pakinabang niato asin kan bilog niyang banal na Simbahan.

Pamibi sa mga Dolot

P — Kagurangnan, akoo an mga pamibi kan mga paratubod na may mga dolot na sacrificio, tanganing, huli kaining mga gibo nin maimbod na pagpamibi, makaabot kami sa langitnon na kamurawayan. Huli ki Cristo samong Kagurangnan.

B — Amen.

Prefacio VII sa mga Domingo kan Ordinariong Panahon

An kaligtasan huli sa pagkuyog ni Cristo

P — An Kagurangnan mapa-saindo.

B — Asin sa saimong Espiritu.

P — litaas an mga puso.

B — Initaas mi na sa Kagurangnan.

P — Magpasalamat kita sa Kagurangnan, satuyang Dios.

B — Maninigo asin Dapat.

Totoong maninigo asin dapat, matanos asin nakakaligtas, na danay asin minsan saen magpasalamat kami saimo: Kagurangnan, banal na Ama, Dios na makakamhan na daing kasagkoran:

Ta sa siring na pagkaherak namotan mo an kinaban: sinugo mo samo an Paratubos man sana; binoót mong makisumarô siya sa samong kamugtakan, maliban sa kasâlan, tanganing mamotan mo samo an namotan mo sa Aki; sa pagkuyog niya binâgo kami para sa saimong mga balaog na napatimasang mi sa pagkasalâ nin dai pagkuyog.

Kaya kami man, Kagurangnan, kaiba kan gabos na Angeles asin Santos nagpapahayag nin pagtubod saimo, maogmang nagsasabi:

Gabos — Banal, Banal, Banal an Kagurangnan Dios ni mga hukbô. An langit asin dagâ pano kan Saimong kamurawayan. Hosana sa kaitaasan. Paladan an minadigdi sa ngaran kan Kagurangnan. Hosanna sa kaitaasan.

Pamibi sa Eucaristia *(Luhod)*

P — Misterio kan Pagtubod.

B — An pagkagadan mo, Kagurangnan, ipinapamareta niamo, an Pagkabuhay mo liwat ipinapahayag, sagkod na ika magdatong.

P — Huli saiya, asin kaiba niya, asin sa saiya, saimo Dios Amang makakamhan kasarô kan Espiritu Santo, an gabos na kagalangan asin kamurawayan, sa gabos na kapanahonan kan mga panahon.

B — Amen.

RITO SA PAGCOMUNION

Ama Niamo *(Tindog)*

P — Natukdoan kan mga nakakaligtas na tugon, asin pinatood kan diosnon na kaugalian, nangangahas kitang magsabi:

Gabos — Ama niamo, na yaon sa langit: pabanalon an ngaran mo; magdatong an kahadean mo; mangyari an boót mo sa dagâ nin siring sa langit. An samong kakanon sa aroaldaw itao mo samuya ngonian, asin patawadon mo kami sa samong mga kasâlan, siring na

pinapatawad niamo an mga nagkakasalâ samuya; asin hare kami pagdaraha sa sugot; kundi agawa kami sa maraot.

P — Agawa kami sa gabos na maraot, namimibi kami Kagurangnan; warasan sa mga aldaw niamo an katoninongan, tanganing kaming natabangan kan saimong pagkaherak magin danay na talingkas sa kasâlan asin man ligtas sa gabos na kapurisawan: mantang kami naghahalat kan maogmang paglaom asin pagdatong kang samong Paraligtas na si Jesu Cristo.

B — Huli ta saimo an kahadean, asin an kapangyarihan, siring man an kamurawayan sa mga kapanahonan.

P — Jesu Cristong Kagurangnan, ika na nagsabi sa saimong mga Apostoles: Katoninongan iwinawalat ko saindo, an sakong katoninongan itinatao ko saindo:

hare paghilinga an samong mga kasâlan, kundi an pagtubod kan saimong Simbahan; asin papagkanigoa na siya mapatoninong asin magkaboronyog susog sa saimong kabotan. Ika na nabubuhay asin naghahade sa kapanahonan kan mga panahon.

B — Amen.

Pagpapahayag kan Katoninongan

P — An katoninongan kan Kagurangnan danay na mapa-saindo.

B — Asin sa saimong espiritu.

P — Magpatinaraohan kamo nin katoninongan

Cordero

B — Cordero kan Dios, na nagpaparâ kan mga kasâlan kan kinaban: kaheraki kami. Cordero kan Dios, na nagpaparâ kan mga kasâlan kan kinaban: kaheraki kami. Cordero kan Dios, na nagpaparâ kan mga kasâlan kan kinaban: tawi kami nin katoninongan.

Pag-alok sa Pagcomunyon *(Luhod)*

P — Uya an Cordero kan Dios, uya an nagpaparâ kan mga kasâlan kan kinaban. Paladan an mga inapod sa pamanggi kan Cordero.

Gabos — Kagurangnan bako akong maninigo na ika magdagos sa sakuyang harong: alagad magtaram ka sana, asin an sakong kalag maomayan.

Antifona sa Comunion

(Cf. S 33, 11)

(Sinambit kun mayong Awit sa Comunion)

An mga mayaman nangaipo asin nagutom; alagad an mga naghahanap sa Kagurangnan dai magkukulang sa gabos na karahayan.

Pamibi

Pakacomunion (Tindog)

P — Mamibi kita.

Kagurangnan, mapakumbaba kaming nag-aarang sa saimong kadakulaan, tanganing, siring na pinapabasog mo kami kan orog kabanal na Hawak asin Dugo, giboha man kaming makihiras sa buhay na diosnon. Huli ki Cristo samong Kagurangnan.

P — Amen.

RITO SA PAGTAPOS

Solemng Bendicion

Ordinariong Panahon I

Bendicion ni Aaron

P — An Kagurangnan mapa-saindo.

B — Asin sa saimong espiritu.

P — Iduko an saindong mga payo asin maghagad nin bendicion sa mahal na Dios.

Bendicionan kamo asin amponon nin Kagurangnan.

B — Amen.

P — Ipasirang nin Kagurangnan sa saindo an saiyang lalawgon asin kaherakan niya kamo.

B — Amen.

P — Atamanon niya kamo asin iwaras sa saindo an katoninongan.


B — Amen.

P — Asin bendicionan kamo kan Dios na makakamhan: an Ama, asin an Aki, ✠ asin an Espiritu Santo.

B — Amen.

P — Lakaw kamo sa katoninongan ni Cristo.

B — Salamat sa Dios.



PAMIBI PARA SA TAON KAN MISION SA MGA NACION

O Dios, mamomoton niamong Ama, pinadara mo an saimong Bogtong na Aki sa kinaban tanganing iharubay an Marahay na Bareta nin kaligtasan sa gabos: sa mga makasalan, sa mga dukha, sa mga inaapi, sa mga naghehelang, sa mga hinaboan, sa mga pinabayaan. Iduyos niya an saiyang buhay sa Cruz para samo. Asin nabuhay-liwat sa bagong buhay tanganing iligtas kami asin makipag-olitan saimong. Ipinadara mo an saimong Espiritu Santo sa mga Apostoles tanganing ipadagos an gibo kan saimong Aki asin darahon an gabos sa kaligtasan.

Nagpapasalamat kami saimong Ama, sa pagdara samo gikan sa kadikloman pasiring sa kaliwanagan. Huli kan saimong mamomoton na plano, limang gatos na taon na an nakaagi, nag-abot sa samong ronâ an mga misionero tanganing iharubay sa samong mga kamagurangan an Evangelio ni Jesus, saimong Aki, Huli kaini kami nagin saimong banwaan asin Simbahan. An balaog nin pagtubod an samong antabay sa kadikloman asin sa kaliwanagan, sa mga kadaogan asin kapangganahan kan samong kasayasayan bilang saimong banwaan. An samong pagtubod nagin tunay na liwanag na nagbabanaag sa kadikloman.

Bagoa samo an biyaya kan saimong Espiritu na nagsasadol samo na magin mga saksi ni Jesus saimong Aki, sa kinaban na baranga huli sa kapasloan, violencia, injusticia, kahelangan asin pagtios.

An samong pagtubod makadara lugod samo sa pagkasararo bilang mga aki mo na atamanon asin kamotan an lambang sarô. An Espiritu Santo magpakusog logod samo tanganing kami magin mga paraharubay kan Marahay na Bareta sa samong mga tugang sa Asia asin sa gabos na mga nacion. Tawe kami nin odok sa boót na kamawotan na tabangan an samong kapwa na madara sinda sa pagtubod sa Kagurangnan na si Jesus tanganing makahiras sinda sa saimong kaogmahan asin buhay.

Antabayan asin ipamibi lugod kami ni Nuestra Señora de Peñafrancia, an Bitoon kan Pagharubay kan Marahay na Bareta, sa samong buhay asin sa paghiras kan samong pagtubod sa samong kapwa.

Lugod an samong lipotok na pagkamoot asin devocion saiyang samuyang Mahal na Ina, maghubog samo na magin mga tunay na disipulos asin mga saksi ni Jesus sa gabos, andam sa gabos na panahon na magin makinuyog-kuyog sa anuman na hagadon ni Jesus samo.

Ini hinahagad mi sa ngaran ni Jesu Cristo, saimong Aki, na nabubuhay asin naghahade, kasarô kan Espiritu Santo, Dios, sa kapanahonan kan mga panahon. Amen.



sambanwá
GIYA SA PAGSAMBA KAN BANWAAN NIN DIOS



MOST REV. ROLANDO J. TRIA TIRONA, OCD, DD, Arzobispo kan Caceres
REV. FR. LUISITO A. OCCIANO, Direktor, Caceres Commission on Communications
REV. FR. GLENN C. RUIZ, Direktor, Commission on Liturgy
REV. FR. ERIC P. BOBIS, In-Charge, Social Media
JOHN PAUL M. AVEN asin **JUAN CARLOS R. MADRID**, Mga Editor

Hinimo asin inandam kan Archidiocesis nin Caceres, sa pangengenot kan Caceres Commission on Communications asin Commission on Liturgy. Ciudad nin Naga, Pilipinas • 2021

TABANGAN NA MASUSTENIR AN SAMBANWÁ!

Para sa mga donacion, puwedeng magdeposito sa:
Banko asin Branch: **BDO UNIBANK, INC. (BDO) PANGANIBAN DRIVE, NAGA CITY**
Account Name: **CACERES COMMISSION ON COMMUNICATIONS**
Account Number: **008440050319**